

SCRIPT OF EVENING GOJRI NEWS BULLETIN 28AUG 2026

1700HRS

اوننگ گوجری نیوز بولیٹن 28 اگست 2026

یوہ آکاشوانی جموں ہے محمد اشفاق تے نصرت تیں خبر سُنو۔

HEADLINES

- ۱۔ وزیر اعظم نریندر مودی نے کہیو ہے جے جن دھن یوجنا ملک پھر مانہہ معاشی تعاون تے عوام نانہہ خود مختار بنان مانہہ اہم کردار ادا کرے۔
- ۲۔ جموں شہر مانہہ اج قدیم روایت پتنگ بازی نانہہ انجام دے غے رکشا بندھن غا تہوار نانہہ بڑا جوش و خروش سنگ منایو گیو۔
- ۳۔ مرکزی وزیر ڈاکٹر جتندر سنگھ نے کہیو ہے جے جموں تے سرینگر بشکار جلد تیجی وندے بھارت دیل گڈی نانہہ روانہ کیو جے غو۔
- ۴۔ سالانہ شری امرناتھ یاترا اج اختتام پزیر ہوئی جس مانہہ 4 لکھ 80 ہزار عقیدت منداں نے شرکت کی۔
- ۵۔ جموں کشمیر نے 2035 توں پہلاں 11 ہزار میگا واٹ غی بجلی پیدا کرن گا عزم گو ہدف تہہ کیو ہے۔ اس بارے چیف سیکرٹری نے ان پروجیکٹاں بارے جائیزو لیو تے ویلے سرے مکمل کرن غا عزم نانہہ اُجاگر کیو۔

PM JAN DHAN YOJANA

پردھان منتری جن دھن یوجنا نے اج 12 سال مکمل کرلیا ہیں ۔ یوہ ملک مانہہ مالی شمولیت نانہہ فروغ دین غی جانب ایک اہم سنگ میل ہے۔ یہ سکیم وزیر اعظم نریندر مودی نے 2014 مانہہ اج ہی غے دن شروع کی تھی۔ پردھان منتری جن دھن یوجنا غے تحت ہُن توڑی 59 کروڑ تیں زیادہ بینک اکاؤنٹس کھولیا جا چکا ہیں۔ جد کہ ان اکاؤنٹس مانہہ مجموعی طور ور 3 لکھ 17 ہزار کروڑ روپیہ جمع ہیں ۔ اس سکیم کا نتیجہ مانہہ بھارت غا فنانشل انکلوژن انڈیکس 2018 مانہہ 53.9 تیں بدھ غے 2026 مانہہ 67 ہو گیو ہے۔ جیہڑو قرض ، بیمہ ، بچت تے ڈیجیٹل ادائگیاں توری عوام غی بہتر رسائی نانہہ ظاہر کرے۔

RAKSHA BANDHAN

اج پورا ملک غے نال نال جموں مانہہ وی راکھی غو تہوار بڑا جوش و خروش سنگ منایو جارہیو ہے یاد رہ جے یوہ تہوار پائی پین غے بشکار ایک خوبصورت رشتہ گا طور ور منایو جے جس مانہہ بہن پائی نانہہ راکھی بدھ غے محبت گو اظہار کرے تے پائی اس غی حفاظت غی یقین دہانی کرے۔ اس موقع ور صدر جمہوریہ دروپدی مرمو ، نائب صدر، سی پی راداکرشن تے وزیر اعظم نریندر مودی نے اج نویں دلی مانہہ متا سارا بچاں تے طالب علماں سنگ اس تہوار نانہہ خوشی سنگ منایو ۔ اس موقع ور صدر جمہوریہ نے کہیو جے یوہ تہوار پین پائیاں بشکار تعلق نانہہ مزید مضبوط کرے تے خانداناں غی یکجہتی نانہہ ظاہر کرے۔ اس ضمن مانہہ وزیر اعظم نریندر مودی نے وی قوم نانہہ مبارک باد پیش کرتا واں نیک خواہشات پائی چاری تے امن غی دُعا کی ہے۔ راکھی گا اس تہوار

گا موقع ور لیفٹیننٹ گورنر منوج سنہا تے وزیر اعلیٰ عمر عبداللہ نے وی مبارک باد پیش کی ہے تے کہیو جے مہاری دعا ہے اس سنگ خطہ مانہ امن خوشحالی تے پائی چارہ غی فضا قائم وے اس دوران جموں مانہ اس تہوار غے پیش نظر پتنگ بازی ایک مقبول روایت ہے جس مانہ بکھ بکھ خانداناں تیں افراد اک کھلا میدان مانہ جمع ہوئے پتنگ بازی نانہ انجام دیں پتنگ نانہ مقامی طور ور گڈی وی کہیو جے جس نانہ ایک ڈور سنگ ہوا مانہ اُدیو جے اس ضمن مانہ اعلیٰ حکام نے خبرناک چائنیز دور گا استعمال توں منع کیو ہے جھپڑی کہ انسان جانوراں تے پرنداں واسطے نقصان دہ ثابت ہوسکے۔

VANDE BHARAT

مرکزی وزیر ڈاکٹر جتندر سنگھ نے کہیو ہے جے جموں تے سرینگر بشکار تیجی وندے بھارت ریل جلد روانہ کی جے غی جس سنگھ جموں کشمیر غی عوام نانہ مزید آسانی لب سکے غی ایک ویڈیو پیغام مانہ جناب سنگھ نے کہیو جے ریلوے بھارت وزارت غی طرفوں اس نانہ منظوری دے دی گئی ہے اس موقع ور اُنہاں نے وزیر اعظم نریندر مودی تے ریلوے وزارت غو شکریو ادا کیو وزیر موصوف نے اس دوران جموں کشمیر مانہ بکھ بکھ اہم تے عظیم پروجیکٹاں ور بولتاں واں کہیو جے چناب ریلوے پُل جیسا بڑا پروجیکٹ جموں کشمیر غی سیاحت تے اس گا درخشاں مستقبل غی عکاسی کریں۔

INDIA NEPAL

نیپال گا علاقہ مانہ تباہ کُن سیلاب غی وجہ سنگ 469 افراد غی موت واقع ہوگئی ہے جد کہ 1545 افراد لاپتہ دسیا جارہیا ہیں اس دوران بچاو ٹیم دریاواں غے کنارے زندہ بچ جان آلا تے دیگر لاپتہ افراد غی تلاش کررہی ہے۔ اس ضمن مانہ بھارت نے بڑا پیمانہ ور امدادی تے بچاو کاروائی چلاتاں واں قریب 84 بھادتی شہریاں نانہ بچایو گیو ہے خارجہ امور غی وزارت غو کہنو ہے جے اجیں توڑی 290 غے قریب بھارتی شہریاں سنگ رابطو نی ہوسکیو جھپڑا نیپال مانہ موجود تھا تے اُن غی تلاش کرغے محفوظ مقام ور منتقل کرن غی کوشش کی جارہی ہے۔ اس سلسلہ مانہ وزیر اعظم نریندر مودی نے نیپال گا وزیر اعظم بلندر شاہ سنگ گل بات کرغے مکمل امداد غی یقین دہائی کی ہے۔

BRICS

بھارت 12 تے 13 ستمبر 2026 نانہ بھارت منڈاپم نویں دہلی مانہ 18 واں برکس اجلاس غی صدارت کرے گو۔ اجلاس مانہ برکس گا رُکن تے شراکت دار مُلکاں گا رہنما تے دیگر مدعو ممالک شرکت کریں گا۔ بھارت مانہ ہورئی اس برکس اجلاس غو موضوع لچک ، جدت تعاون تے پائیداری خاطر تعمیر رکھیو گیو ہے جھپڑو کہ وزیر اعظم نریندر مودی گا نظریہ انسانی اقدار غی عکاسی کرے۔ بھارت غی صدارت مانہ برکس گا اس اجلاس غے پیش نظر ملک پر گا 25 شہراں مانہ قریب 350 میٹنگ منعقد کی جیں غی جت بکھ بکھ اہم پہلوں ور تبادلہ خیال کیو جے غو۔ یاد رہ جے بھارت نے برکس گا گزریہ 16، 2012 تے 2021 غا اجلاس

غی صدارت کی تھی۔ 2021 گا اجلاس غی صدارت کی تھی تے 2026 غو اس اہم
اجلاس سنگھ برکس گا 20 سال مکمل وین غا۔

AMARNATH YATRA

سالانہ شری امرناتھ یاترا اج جموں کشمیر مانہ رکشا بندھن غا موقع ور اختتام
پزیر ہوئی۔ 57 روزہ یاترا اس سال 3 جولائی نانہ شروع ہوئی تھی۔ یاترا غا اختتام
ور مہنت دیندرگیری غی قیادت مانہ پوتر چھڑی مبارک پوتر گفا توڑی پُجائی
گئی۔ اس سال پہلگام تے بالٹال دواں رستاں تیں 4 لکھ 80 ہزار تیں متہ عقیدت منداں
نے امرناتھ گفا مانہ حاضری دتی۔ یاترا غے دوران عقیدت مند ، سطح سمندر تیں
تقریباً 3 ہزار 8 سو 88 میٹر غی بلندی ور واقع شری امرناتھ گفا غا درشن واسطے
جیں، جت قدرتی طور ور بنن آلا برفانی شیولنگ غے درشن کریں تے بھگوان
شیو غو آشیر واد حاصل کریں۔ سالانہ بڈھا امرناتھ یاترا وی اج اختتام پزیر
ہوئی۔ شراون غا مہینہ مانہ منعقد ہون آلی 12 روزہ یاترا غے دوران عقیدت مند،
جموں کشمیر غا پونچھ ضلع مانہ واقع بابا بڈھا امرناتھ مندر مانہ پوجا پاٹھ
واسطے پُجا ہیں۔ بابا بڈھا امرناتھ مندر پونچھ ضلع غی منڈی تحصیل غا راج پوری
گراں مانہ واقع ہے تے بھگوان شیو تیں منسوب ہے۔

CS HYDROPOWER PROJECT

جموں کشمیر مانہ بجلی گ شعبہ مانہ بڑی تبدیلی غی تیاری کی جارئی
ہے۔ حکومت نے دسمبر 2035 توڑی پن بجلی پروجیکٹ تیں بجلی پیدا کرن غی
صلاحیت بدھا غے 10 ہزار 9 سو 69 عشریہ 65 میگا واٹ کرن غو جامع تے مقررہ
مدت ور مبنی منصوبہ تیار کیو ہے۔ اس وقت جموں کشمیر مانہ پن بجلی غی
نصب شدہ صلاحیت 3 ہزار 5 سو 40 عشریہ 15 میگا واٹ ہے۔ اس منصوبہ گو مقصد
توانائی غی ضروریات نانہ مضبوط بنانوں، بیرونی ذرائع تیں بجلی ور انصار کھٹ
کرنو تے طویل مدتی اقتصادی ترقی غی بُنیاد تیار کرنو ہے۔ اس سلسلہ مانہ چیف
سیکرٹری اٹل ڈلو غی صدارت مانہ اج ایک اعلیٰ سطحی میٹنگ منعقد ہوئی، جس
مانہ منصوبہ غو تفصیلی جائزو لیو گیو۔ میٹنگ مانہ زیر تعمیر بڑا پن بجلی
پروجیکٹ غی مالی تے زمینی پیش رفت، تعمیر تے بجلی غی پیداوار شروع کرن
غا شیڈیول غے نال نال آن آلا 10 براں غے دوران بجلی پیدا کرن غی صلاحیت
مانہ بروقت اضافہ واسطے ضروری اہداف ور وی تبادلہ خیال کیو گیو۔

JAMMU E-BUSES

جموں شہر نانہ مرکزی پی ایم ای سیوا سکیم غے تحت 25 ہور بجلی ور چلن آلی
بس دتی گئیں ہیں اس سلسلہ مانہ جموں سمارٹ سٹی لمٹیڈ گا سی ای او دیوانش
یادو تے پی ایم آئی ، الیکٹرو موبیلٹی سلیوشن پرائیویٹ کمٹیڈ غے بشکار معاہدہ ہوو
ہے۔ واضع رہ جے جموں شہر مانہ پہلاں ہی قریب 100 ای بس چل رئی ہیں جن
مانہ 25 بساں گو ہور اضافو کیو گیو ہے۔ یہ نویں بس بھگوتی نگر ، ٹپو توں روانہ
کی جیں غی، جس سنگ عام عوام نانہ سہولت تے دیگر ماحولیاتی نظام نانہ
صاف رکھن مانہ مدد لب سکے غی۔ اس ضمن مانہ پی ایم ای بس سیوا سکیم

غے تحت مزید 75 بساں غی تجویز پیش کی گئی ہے جس سنگ شہر پھر مانہ ای
بساں غی تعداد 200 توڑی پُچ سکے۔

MEGA GARDEN NANGALI SAHIB

پونچھ ضلع مانہ مزہبی سیاحت نانہ فروغ دین غا مقصد تیں جموں کشمیر حکومت
نے ڈیرہ ننگالی صاحب تیں قریب ایک میگا کارڈن غی تعمیر واسطے 2 کروڑ
روپیہ تیں زیادہ تیں رقم منظور کی۔ ضلع گرو دوارہ پر بندھک کمیٹی پونچھ غا بینر
تلے کئی سکھ مزہبی تے سماجی تنظیمیں نے حکومت غا اس فیصلہ غو خیر مقدم
کیو ہے۔ تنظیمیں نے کہیو کہ مجوزہ میگا گارڈن تیں تاریخی مزہبی مقام غے کول
کال غی خوبصورتی مانہ اضافو وے گو تے ات آن آلا عقیدت منداں نانہ مزید
سہولیات فراہم ویں غی۔ انہاں نے کہیو کہ اس پروجیکٹ تیں پونچھ مانہ مزہبی
سیاحت نانہ وی نمایاں فروغ لبے غو تے مزید سیاح تے عقیدت مند ات آن در
راغب ویں غا۔ اس بارے گل کرتا واں ، سکھ رہنماواں نے اس طرح کہیو۔-----
